

## A LU LITTURI

Prima ca lèggi ascùtami litturi,  
nun t'aspittari 'n-lustru di cumèta  
raru, miraculusu, ncantaturi ...  
Stu libru è 'n-suspiru di pueta.  
Dintra ci trovi ciàuru di ciùri  
pinzeri ammazzunati a cera leta  
cu 'n-sulu ntentu: siminari amuri  
e na spiranza: junciri a la mèta!

## A LI ME' VERSI

Cari virsuzzi me' c'appena scritti  
nta lu casciumi fustivu sarvati,  
ma nuddu vi liggiu, nuddu vi vitti,  
durmistivu accussì sonni biati.  
Vinni lu tempu, o versi biniritti,  
di cuminciari a jiri strati strati  
e vi cunsigghiu di ristari zitti  
si càpita ca s'iti scuncicati.  
Purtati 'n ogni cori lu cunfortu,  
purtaticci la paci e lu risettu  
e si quarchi cafùni vi fa tortu  
trattatilu lu stissu cu rispettu ...  
Vui s'iti la me vuci doppu mortu  
e lu sapiti chiddu ca m'aspettu!

Vi mannu disarmati a la stranìa  
e quasi quasi ni sugnu cuntentu:  
S'iti l'orgogghiu di la vita mia;  
grapiti l'occhi e jiti a passu lentu  
cusà ci sunnu ntoppi pi la via,  
secunnu zoccu vidu e zoccu sentu  
finiù l'amuri pi la puisia,  
nun c'è chiù postu pi lu sintimentu.  
Perciò virsuzzi me' s'iti avvisati,  
nun v'aspittati certu bonacera,  
e quannu mi ni vaju e vui ristati

putati 'u sulì di la primavera  
ntô cori di li schetti e maritati:  
Vui siti l'asta di la me bannerà!

Nun sparagnai strapazzi nè suduri  
pi farivi accusì siccomu siti,  
aviti lu profumu di li ciuri  
simplici comu gigghi e margheriti.  
Nun addisiati lussu nè splenduri  
ca siti figghi mei e lu sapiti,  
vi nutricai cu lu chiù grann'amuri,  
nun lu scurdati quannu vi ni jiti.  
Secunnu la saggizza di l'antichi  
nun ni sunnamu sonni di vittoria,  
ristamu d'accussì tra li chiù nichì  
ca nenti dura, tuttu è vanagloria ...  
Cu' semu versi me'? Semu muddichi  
persi nta lu trubbèri di la storia!

ANNI '90

Chistu è lu tempu  
di li vacchi grassi...  
Lu tempu di lu sfardu  
e di lu squacchiu,  
lu tempu di lu cappottu  
cu lu pilu,  
di li stivaletti a coscia,  
di la machina putenti,  
di lu motoscafu,  
di lu villinu a mari  
e di manciari a sbafu  
cu pìcca travagghiari!  
Chistu è lu tempu  
di li vacchi grassi...  
Lu tempu d'oru,  
tanticchia cuscialoru:  
A fini simana  
si va 'n villiggiatura  
pi spenniri li pìcciuli  
nun manca cugnintura!  
Chistu è lu tempu  
di l'egoismu umanu  
e tutti n'aiutamu  
cu li pedi e cu li manu...  
Si nun turnamu 'n rotta  
cu bussula e timuni  
fa cuntutu ca ssu sperperu

ni mètti a dinucchiuni!  
Si nun grapemu l'occhi  
prima di lu dumila  
n'arriducemu arreri  
cu l'ogghiu a la cannila!

## A MARGARITA

Sàcciu ca l'amuri,  
chiddu veru,  
è battitu d'ali di palumma  
ca sbulazzanu nta 'n-celu  
senza tempu...  
Sàcciu ca l'amuri  
si trasi nta lu cori  
cu lu so tanfu di zàgara  
lu sculpisci  
e ni fa altaru di paci,  
e ci duna occhi pi vùdiri  
e oricchi pi sèntiri  
l'innu di la vita  
cantatu da vuci d'angili.  
Pirchè l'amuri, chiddu veru,  
nun è sdilliniu di sensi,  
ma ciuciulù d'aceddi,  
ciatu di celu,  
àlitu di ventu,  
raggiu di suli  
e còcciu di furmentu!  
E tu, ciuri di maju  
càrricu di suli  
ca ti lassasti cogghiri di mia  
e spugghiari petalu doppu petalu  
pi vint'anni e chiù,

lu sai cu quant'amuri  
ti nutricu  
e spàsimu e faticu  
pi ncannizzari sempì jorna novi.  
Lu sai cu quant'amuri  
mi scippu lu cori di lu pettu  
e ti lu dugnu comu civu  
a fedda a fedda!  
Lu sai, e puru ju lu sacciu,  
pi chìssu nnamuratu,  
ti mmitu a la surgenti di la vita  
pi biviri cu mia acqua d'amuri  
pi nun siccarì chiù, mia Margarita!

## ACCIANCU A TIA

Nun àppi mai siti acciancu a tia,  
eri 'n-puzzu d'amuri e mi saziasti:  
Vippi sangu sprimutu di li stiddi!

Daveru 'un àppi fami acciancu a tia,  
a via di vasuna mi sfamasti  
cu ddi to labbra ch'eranu miliddi!

E quannu àppi friddu, bedda mia,  
na cuperta di celu arraccamasti  
usannu pi ruccheddu li capiddi!

Sapivi tuttu chiddu chi vulìa,  
lu cori di lu pettu t'ascippasti  
e mi lu dasti nzemi a ddi ciuriddi!

E ju...? Ti detti sulu l'arma mia...  
Lu jornu ca murennu mi lassasti,  
mi siccaru lu cori e li masciddi!



## A 'GNAZIU BUTTITTA

Stanotti nun trovu risettu,  
nun pozzu dormiri cuètu,  
penzu a Buttitta  
ca nun voli mòriri  
e tuttu scantatu  
joca cu la morti  
ammucciareddu.

E, comu lu viteddu,  
storci lu coddu,  
appizza li pedi  
e nun voli caminari  
pirchè senti lu tanfu  
di lu sangu...

Accussì fa Iddu,  
quannu si senti sulu  
cu la morti acciancu  
ca lu neuèta.

Ma Iddu lu sapi  
ca lu veru pueta  
nun mori mai?

Lu veru pueta campa  
sempi e pi sempi  
nta la notti di li tempi!  
E quantu cori accarpa  
cu li so' versi duci!

E trasi a tutti banni  
pi porti nichì e granni!  
Lu veru pueta  
è comu la spiranza:  
Nun mori mai!  
Lu veru pueta  
è acqua chi leva siti  
è sulì chi quadìa  
è portu di gioia e festa  
'n menzu ogni timpesta!  
E duranti la battaglia  
di la vita,  
è lama di cuteddu  
ca quannu tagghia  
(ju lu sacciu)  
leva tuttu lu marciu  
e sana ogni firita.  
O granni Vati ascùtami,  
fatti curaggiu  
ca mòriri nun poi!  
Tu si comu 'n-raggiu  
vinutu 'n terra  
pi vinciri lu scuru.  
Chissu lu sapi Diu  
e ju lu sacciu puru;

ju, ca sugnu nuru,  
no comu tia vistutu  
cu 'n-linzolu di saggizza.  
Ju sugnu strasicuru  
ca la to amarizza  
è sulu scantu.  
Senti zoccu ti dicu:  
- Po mòriri lu cantu,  
lu cantu meludiusu di 'n-aceddu?  
No! T'arresta ncuddatu  
dintra lu saccu di li ricòrdi,  
ma misu tantu 'n funnu  
ca nuddu ti lu scippa -  
Ascùta chiddu ca Ti dicu:  
- Da chi munnu è munnu,  
lu cantu di l'aceddi  
s'assimigghia...  
Chissa è la meravigghia  
di stu camìnu  
ca chiamanu distinu  
e nuddu sapi comu,  
pirchè e pi quali versu  
governa st'universu!  
La morti nun existi  
pi chiddi comu a tia.

Lu veru pueta nun mori  
pirchè la puisia  
havi lu sapuri  
di l'eternità,  
e Tu eternu duri  
pirchè ti pasci  
jornu pi jornu  
d'immortalità...  
Comu lu sulì  
ca stu jornu mori  
e dumani rinasci!

## BASTA NA FAIDDA

Basta na faidda  
addumata pi jocu  
pi sbampari lu focu  
lu focu di la guerra  
supra tutta la terra!  
E di faiddi addumati  
pi nostra sfurtuna  
ci ni sunnu assaliddi  
sbampati comu stiddi  
nta tuttu lu munnu.  
Fratuzzi, arrisbigghiamuni,  
è tempu di vigghiari;  
ni vonnu assassinari  
la paci prizziusa  
ca 'i nostri patri  
pagaru c''u sangu!  
'N ogni pizzu di munnu  
vigghiamu, vigghiamu  
cu l'occhi sbarrachiatu  
e appena viremu  
faiddi addumati  
ciusciamu, ciusciamu  
cu tuttu lu ciatu  
c'avemu 'n corpu.  
Astutamuli tutti ssi faiddi  
ca si sbampa lu focu  
lu focu di la guerra  
stavota è la fini  
di lu pianeta terra!

## ASCÙTA OMU DI LU NORD

Ascùta omu di lu nord,  
nun parrari a vanvira,  
la me terra nun è jumenta pazza  
ca scaccia li so' putri  
e l'allavanca unni veni veni  
'n mucca di lu lupu!  
Mafia, lupara, morti strati strati...  
Nun jochi troppu cu la fantasia?  
Sentu lu leccu di li to' risati  
e lu rivugghiu di l'ipocrisia!  
Ma chi ni sai tu ca stai luntanu,  
zoccu ni sai di sta terra mia  
di la ducizza di la conca d'oru,  
di Mungibeddu, d'Erici e Segesta?  
Veni a lu sud, ascùta a mia,  
unni ciuscia lu ventu di Sciroccu  
e cu la coppula 'n testa  
trova rifriscu sutta li zabbari.  
Veni a lu sud e jinchiti d'amuri  
unni muddichi attuppanu la fami  
unni puru li petri cantanu  
accumpagnati di lu marranzanu  
na storia millenaria di duluri.

Veni, veni a lu sud e ascùta  
l'innu d'amuri di sta terra mia  
grapiti l'occhi e talia  
l'unni scueti di stu mari azzòlu;  
abbannùnati supra sti scogghi  
vaviàti di marusu,  
scinni, scinni di ddocu susu,  
camina acciancu a mia pi sti trazzeri  
'n menzu sti ristucciati  
e di sicuru cangi ssi pinzeri.  
Ti sentirai me frati,  
figghiu amurusu di sta terra santa  
e, comu pi magia, senza ca ti n'adduni,  
prujennumi la manu,  
ti sentirai 'n-pocu sicilianu!

## C'ERA LA GUERRA TANNU

Ricordu quannu arzuni  
appressu di me patri  
circavu appicuruni,  
cu tantu sintimentu,  
ddi spichi di furmentu.

C'era la guerra tannu  
e tantu tantu scantu!

Ricordu la ducizza  
d'u pani di canigghia  
e la gran cuntintizza  
di tutta la famigghia,  
la gioia d'i mei frati  
pi du' ciciri caliati.

C'era la guerra tannu  
e tantu tantu scantu!

Ci stesi chiù d'un annu  
sfollatu a la "Custera"  
'n campagna di me nannu  
mangiannu, quannu c'era,  
jittatu nta 'n-agnuni  
na fedda di miluni.

C'era la guerra tannu  
e tantu tantu scantu!



Pi nenti si sparava:  
frati contru frati!  
Quarcunu murmurava:  
- Verrannu l'alleati-  
E ntantu si mùria  
pi fami e malatìa!

C'era la guerra tannu  
e tantu tantu scantu!

Li 'ranni nfacinnati  
rischiavanu la vita  
p'un saccu di patati  
e nui picciuttunazzi  
taliàvamu ammucciati  
lu jocu di ssi pazzi.

C'era la guerra tannu  
e tantu tantu scantu!

Finiu pi furtuna  
ssa guerra scillirata  
c'ammazza e nun pirduna,  
ma nun canciau sunata...  
Ristaru li patruna  
unni eranu assittati,  
la stissa è la canzuna:  
Lu riccu sciàla e gori,  
lu scarsu scàtta e mori!

## CHI PREJU

Chi preju  
quannu 'u suli la matina  
pigghia lu focu  
di lu so cufuni  
e, allegramenti,  
tuttu lu rimina!  
Doppu, astùta li stiddi  
cu 'n-ciuciùni, cogghi  
lu scuru e l'ùmmiri stinnuti  
'gnuni 'gnuni e, adaciu adaciu,  
cu manu di fata,  
sciògghi la jilata.  
E doppu, quannu l'aceddi,  
l'arvuli, la terra e la marina  
vigghi sunnu e pari  
ca rinasci lu munnu,  
lu suli trasi  
ntra tutti li casi  
e pari ca dici a l'omu  
duci duci, cu 'n-àlitu di vuci:  
- ancòra dormi?  
Sùsiti e camina!-  
E l'omu 'n armunìa  
cu la natura  
nèsci di 'n casa  
e torna quannu scura.  
Però succeri spissu  
ca suli stiddi e luna  
brillanu 'n celu  
e nuddu si n'adduna!